

中華民國二十四年五月初版
再版

影印
資治通鑑
附外紀
(精裝二冊)

實價
八十元

三十一年六月八日改訂

出版者
國學整理社

發行者
世界書局有限公司代表人
陸高韻

印刷者
上海大連灣路
世界書局

發行所
上海及各省
世界書局



版權所有
不准翻印

資治通鑑外紀序

道原好著書志欲籠絡宇宙而無所遺其著資治通鑑外紀十卷未以傳人病亟猶汲汲借人書以參校己之書是正其失氣垂盡乃口授其子義仲爲書凡使撰外紀序皇祐初有詔士能講經義者聽別奏名其中所對最精詳先具疏次引先儒異說末以己意斷而論之凡二十問所對皆然主司驚異擢爲第一及發糊名廼進士劉恕年十八矣光以是慕重之始與相識道原乃其字也釋褐鉅鹿主簿遷和川令英宗雅好稽古詔光編次歷代君臣事仍謂光曰卿自擇館閣英才共修之光對曰館閣之士誠多至於專精史學臣未得而知所識者惟和川劉恕一人而已上曰甚善卽奏召之共修書凡數年史事之紛錯難治者則以諉之光仰成而已今上卽位賜名曰資治通鑑道原所編之事皆在通鑑之前故曰外紀焉光尋判西京畱臺奏遷書局後數年道原至洛歸局中以元豐元年九月戊戌終官至祕書丞年止四十七嗟乎以道原之耿介其不容於人齟齬以沒固宜天何爲復病而夭之邪此益使痛惋恟恟而不能忘者也道原其先萬年人祖度爲臨川令卒官葬高安因家焉元豐元年十月日涑水司馬光君實序

資治通鑑外紀注補序

編年之史自春秋經左氏傳而後宋司馬光資治通鑑繼之顧通鑑謙不敢繼春秋而託於繼左傳其書亦起自周威烈王二十四年上距獲麟之歲七十八年則凡春秋前後之跡其事散而無紀其言遠而難徵欲從通鑑上溯左傳尙有絕焉未續之嘆抱殘守闕識者病之宋祕書丞劉恕道原博極羣書深明史法治平中與光同編通鑑有見於此而欲爲通鑑前紀後紀二書因循未果晚年乃口授其子義仲編爲通鑑外紀一書以備前紀之稿本凡爲書十卷十卷之中以包義以來紀爲一卷夏商紀爲一卷周紀爲八卷所采自經說史傳諸子百家而外旁及譜牒讖緯卜筮占驗之書不下二百餘種實足以囊括古今之事變推明衆史之同異其敘春秋二百四十二年之事亦能賅而不縛要而不繁自可與經傳並行不悖光序所云史事之紛錯難治者一以諉之劉氏之學於斯可見非虛語也克家官事之暇頗好史部既校刊資治通鑑於江甯孫淵如觀察因謂克家曰劉氏外紀與通鑑相輔而行誠用胡三省注釋之例注之并以行世此史家不可少之書矣克家因假觀察收藏善本從事此書再三易稿始獲成編雖 氏所據之書今皆可見惟其每載一事或諸書

類同而其言小異者則必左右采獲包羅各家錯綜條貫以矜賅博連綴比附以成文章今則備眾書隨條疏證互明區別抉擿本原不厭煩瑣務存其是亦有本書所不采而事非不經因卽附見用補所略間有引書而誤比事而舛俱卽糾正未敢苟同春秋以前別無專紀故搜羅指証申其推廣自平桓以後因有三傳史記諸書紀載已備遂正著明所采本文閒列訓解詞稍從簡以免雷同剽竊之謂其有本書自注則加原注二字以別之至於目錄之例本如史表不載事端亦仿三省前例未加詮釋凡再閱寒暑而書成依其卷次略爲分析名曰注補幕中洪祐甫孝廉亦喜史學因屬助爲校譌兼乞觀察審定遂以付錄夫胡宏皇王大紀稽古則每信寓言羅泌父子路史註纂述則動徵符籙皆爲有識所嗤道原不載荒唐之說不窮幽渺之辭雖博引詳徵而其旨必軌於正因作注補益識其用心之所在決擇之從嚴焉用是酌蠡尋源擁篲清道於以資讀史之故實未足爲劉氏之功臣尤恐舊業荒墜多見漏略後之君子匡其不逮有深望焉

嘉慶十有九年歲在甲戌二月

通鑑外紀目錄序

夫計億兆者始於一總眾異者歸於同古今兼載則竹帛不能紀撮其機會則事盡於終卷六經具而諸子興文籍煩而譜牒作太史公云黃帝以來皆有年數咸不同乖異歷漢魏晉去古益遠眾言不本於經夸者務爲詭誕包犧前後逮周厲王競列年祀更相違背遼邈無據安能考質存其一說備列于下與刪棄不取者莫知孰得孰失焉疑年茫昧借日名甲子以紀之共和以後則用歲陽歲名而著於上示相別也班固謂三統歷最密杜元凱推春秋當時之歷見二百五十五年晦朔閏及日食而云三統歷術比諸家最疏推經傳朔日皆不諧合也京兆萬年劉恕撰

